

Énte los atentaos del 11-M. Comunicáu

Vienres, 12 de marzu

El xueves 11 de marzu produciéronse una riestra d'ataques directos y indiscriminaos contra la población civil en Madrid nos que morrieron cuasi doscientos persones, la mayor parte d'elles trabayadores, estudiantes y inmigrantes. La matanza perpetrada en Madrid ye inustificable dende cualquier puntu de vista. Queremos espresar la nuestra solidaridá y el nuestru dolor poles víctimes y les sos families.

Nestos díes arródiemos un estáu de confusión permanente, afaláu pol gobiernu y los grandes medios de comunicación. Anguaño ye necesario recordar que dende va meses esiste una amenaza esplicita d'Al-Qaeda de facer atentaos masivos contra los países que participaren activamente na guerra contra Iraq: Estaos Uníos, Gran Bretaña y España.

Nesti contestu, l'enfotu del gobiernu n'afirmar qu'ETA taba tres l'atentáu amuesa a les clares la manipulación que tamos sufriendo. Atopámonos énte'l secuestro de la información a traviés d'estremaos métodos: la presentación de datos que depués rescampren como falsos, l'ocultamientu d'otros y la dosificación de la información de mou funcional a los intereses del gobiernu. Llegó a calificase de "miserables" a quien s'atrevió a duldar de que l'autoría del atentáu yera d'ETA.

L'atentáu del 11-M nun se puede aislar de la política del gobiernu español tanto dentro como fuera de les nuestres fronteres. L'Estáu español ta dende 1986 na estructura militar de la OTAN, y parte de les sos infraestructures tán asitiaes nel territoriu español. Nes bases españoles de la OTAN aterrizaren munchos de los bombarderos que masacraron al pueblu iraquí. El PSOE yá foi cómplice de la Guerra del Golfu de 1991; darréu empecipió un embargu que-y costó un millón de vides al pueblu iraquí. Col gobiernu d'Aznar la unidá d'acción con EE UU reforcióse col sofitu a la guerra d'Afganistán y la participación na guerra contra Iraq. Dentro l'Estáu, bona parte de la población sufre la precariedá xeneralizada, el pieslle de fronteres y la criminalización de toles voces que nun s'axunten a la cruzada nacionalista y belicista del PP.

La violencia que contienen estes lóxicos sociales, espresión de la globalización capitalista, tien mucho que ver cola riestra d'atentaos vivíos en tol mundu dende l'11 de setiembre de 2001. Amás, nun se puede escaecer qu'a quien se-yos llama agora terroristes foron nel so momentu afalagaos, armaos y adiestraos por EE UU y los sos servicios secretos. El protagonismu d'EE UU na estensión de la globalización a escala mundial nun puede facer olvidar que la construcción de la Unión Europea ta presidida por esa mesma lóxica. Ye chocante que los principales partíos de la oposición se xunieren nel intre a la versión del gobiernu, aceptando les sos hipótesis sobre l'autoría del atentáu ensin tomar distancias respecto a elles. Al tiempu qu'apaecien datos que contradecien la primera versión del gobiernu, el restu de los partíos mayoritarios nun fixo más que denunciar que'l gobiernu nun fixere pública tola información que tenía; nengún s'atrevió a contestualizar estos atentaos y pedir responsabilidaes.

Estos atentaos sirvieron y van servir de coartada pa un recorte de llibertaes ensin precedentes, qu'afecta a tola población, sobremanera a la d'orixe estranxeru. Nesti contestu, les midies del gobiernu de regularización de la xente inmigrante afectao polos atentaos y la concesión de la nacionalidá española a les víctimes y familiares directos son un actu d'hipocresía. Contrasten col cierre de fronteres y l'endurecimientu de la Llei d'Estranxería —aprobada pol PP y el PSOE— que provoca la esplotación masiva d'un millón d'emigrantes ensin papeles. Énte la irracionalidá alendada pol gobiernu y los sos voceros, ye necesario vincular esti atentáu cola estensión de la violencia a escala mundial pa caltener el nuestru modelu de desarrollu. Les polítiques del gobiernu español nos últimos años son bon exemplu d'esta lóxica.

Contra la violencia. Contra la guerra. Pol derechu d'autodeterminación de los pueblos. Pol diálogu como vía de resolución de los conflictos. Por toles víctimes.

L'Arcu la Vieya, Cambalache, Coordinadora Ecoloxista, Cosal, Ecoloxistes n'Acción, colectivu feminista Males y Perverses, MRG-Asturies, PCPE-Asturies, Soldepaz-Pachakuti